

Kolokium Sastera Siber Sepakat Wujudkan Portal Penyair Siber

Oleh : **RAMLEE WAHAB**

BATU PAHAT - Dewan Bahasa dan Pustaka Wilayah Selatan (DBPWS), Universiti Tun Hussein Onn Malaysia (UTHM), Yayasan Warisan Johor dan Persatuan Penulis Johor (PPJ) telah berjaya mencapai persetujuan untuk bekerjasama menubuhkan Portal Penyair Siber sebagai wadah kepada para penulis negeri itu berkarya.

Portal Penyair Siber itu nanti akan berperanan mengumpul bahan-bahan penulisan berupa sajak, puisi, pantun, syair dan lain-lain karya seni anak Johor daripada setiap daerah.

DBPWS dan PPJ akan bertindak sebagai kordinator atau pemantau ke atas semua bahan dan hasil karya yang disumbangkan untuk akhirnya dinilai dan disenarai pendekkan dalam Pertandingan Karya Siber 2016.

Keputusan ini dicapai hasil daripada perbincangan yang diadakan sempena

"Kolokium Berkarya Dalam Talian: Ke Arah Ruang Jaringan Siber" pada 19 Mac lalu di Dewan Tunku Mahkota Ismail, UTHM, di sini.

Seramai 480 peserta telah mengambil bahagian dalam kolokium tersebut.

Hasil perbincangan itu mendapati, ramai penulis dan pengkarya sudah beralih arah dengan menghasilkan karya mereka secara dalam talian.

Ini termasuklah mengupas isu-isu yang berkaitan, menyebarkan karya dalam ruang siber serta mengangkat karya berbahasa Melayu ke peringkat global dengan lebih berkesan.

Kolokium tersebut telah dirasmikan oleh Pengerusi Jawatankuasa Belia, Sukan, Kebudayaan dan Warisan Negeri, Datuk Zulkurnain Kamisan.

Yang turut hadir ialah Timbalan Naib Canselor Hal Ehwal Pelajar dan Alumni UTHM, Profesor Madya Dr Asri Selamat dan Pengarah DBPWS, Abd Rahim Omar.

Ahli-ahli panel yang mengambil bahagian pula terdiri daripada Presiden Persatuan Aktivis e-Sastera Malaysia (E-Sastera) Profesor Ir Dr Wan Abu Bakar Wan Abas, Presiden e-Sastera management Enterprise (EsMe) Yohanes Sugianto dan Pensyarah Kanan Fakulti Pengurusan UTM, Skudai, Dr Batiah Hadi.

Objektif kolokium ini adalah untuk memberikan pendedahan kepada penulis untuk berkarya secara dalam talian, mewujudkan pengamatan bahasa dan sastera dengan aplikasi maya, menggalakkan penulis berkarya tanpa sempadan sehingga karya tersebut boleh diakses dalam ruang yang lebih luas, membina daya kreativiti dan aspek pengurusan terhadap karyawan dan menggalakkan pelajar terlibat dalam pembinaan laman e-karya.

Adalah dijangkakan Portal Penyair Siber ini akan siap sepenuhnya dan dilancarkan Disember ini oleh Menteri Besar, Dato' Mohamed Khaled Nordin.



Zulkurnain Kamisan.